



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Distritu Lautem

07 Jullu 2014

JSMP organiza treinamentu kona-ba asesu ba justisa ba ema hotu iha Suku Soru -Distritu Lautem

Iha 04 Jullu 2014, Judicial System Monitoring Programme (JSMP) liuhosi Unidade Peskizador Jurídiku *Legal Research Unit* (LRU), fasilita treinamentu ba comunidade kona-ba asesu ba justisa iha Suku Soru - Distritu Lautem. Programa treinamentu ne'e ho objetivu atu hasae koñesimentu comunidade kona-ba lalaok justisa formal tuir lei aplikavel.

Partisipantes sira ne'ebé partisipa iha treinamentu ne'e hamutuk ema nain 30 (tolu nulu) ne'ebé kompostu husi mane hamutuk nain sanulu resin sia (19) no feto hamutuk nain sanulu resin ida (11).

Materia hirak ne'e kobre sistema justisa formal ho ninia lala'ok, conseitu jerál kona-ba direitus umanus, lei formal ne'ebé vigor iha Timor Leste, kna'ar autoridade judisial, advogadu privadu, defensória públiku, oinsa atu asesu ba justisa formal wainhira sai nu'udar arguidu ka sai hanesan vítima husi krime inklui oinsa prosesa kazu violénsia doméstika ka violasaun seksuál.

“Treinamentu ne'e importante atu hasae koñesimentu comunidade sira liu-liu estrutura suku iha área rural, nune'e sira bele iha koñesimentu natoon kona-ba sistema justisa formal nia prosesu no rekizitus formal sira ne'ebé lei rekere. Dalabarak maioria comunidade sira sempre kestiona katak justisa la funsiona ka justisa la-ihia, tanba deit sira nia limitasaun koñesimentu kona-ba sistema justisa prosesu formal ne'e rasik,” dehan Diretór JSMP, Luis de Oliveira Sampaio.

Xefi Suku Soru, Sr. Estevão da Costa Pereira iha sesaun abertura no enseramentu hato'o sentimentu apresiasaun no orgulhu ho atividade treinamentu ne'e no husu partisipante sira bele aplika materia hirak ne'ebé sira aprende iha sira nia moris.

Durante sesaun treinamentu, JSMP observa katak partisipante sira hatudu sira nia interese hodi partisipa no ativu tebes atraves husi perguntas no apresenta sira nia esperensia konkreta iha sira nia comunidade. Partisipantes maioria kestiona kona-ba krime violénsia doméstika, violénsia seksuál ne'ebé dalabarak akontese iha sira nia suku.

Atividade treinamentu ne'e realiza tanba hetan suporta orsamentu husi Finlandia.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telephone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl